

山西通志卷第一百四十七

山西巡撫都察院右副都御史臣覺羅石麟奉

旨修輯

寓賢

三晉山巖複阻而昔之名賢往往流連其地而不能去自
濩澤七友首陽二士以後如子產季札晏嬰其遺風餘韻
之存於載籍者固已多矣唐宋如李杜韓歐胥客晉錄其
習久者蓋以申僑札之分也志寓賢

太原府

秦澤燕人見逐於趙而入韓魏遇奪益鬲於涂聞應侯任鄭
安平王稽皆負重罪應侯內慙乃西入秦說應侯辭位秦

昭王召見與語大悅之拜爲客卿應侯免相遂拜澤爲秦相東收周室澤相秦數月謝病號爲剛成君

漢

第五種字與先少勵志義永壽中拜兖州刺史時單超兄子匡爲濟陰太守種糾發其賊罪並以劾超超積懷忿恨遂以事陷種竟坐徙朔方超外孫董援爲朔方太守穉怒以待之初種爲滑相以門下掾孫斌賢善遇之及當徙斥斌具聞超謀乃謂其友人同縣閭子直及高密甄子然曰蓋盜憎其主從來舊矣第五使君當投裔土而單超外屬爲彼郡守夫危者易仆可爲寒心吾今方追使君庶免其難若奉使君以還將以付子二人曰子其行矣是吾心也於是斌將俠客晨夜追種及之於太原遮險格殺送吏因下

馬與種斌自步從一日一夜行四百餘里遂得脫歸種匿於閭甄氏數年徐州從事臧旻上書訟之會赦出卒於家鄭康成高密人嘗著戒子書曰吾家舊貧不爲父母羣弟所容去廝役之吏游學周寮之都往來幽并兗豫之域獲勤乎在位通人處逸大儒得意咸從捧手有所受焉

魏

楊俊字季才河內獲嘉人受學陳留邊讓以河內處四達之衝詣京密山間轉避地并州本郡王象少孤時爲人僕隸年十七八使牧羊而私讀書因被箠楚俊嘉其才質卽贖象著家聘娶立屋然後與別魏初任南陽太守以嘗稱臨菑侯被禍衆寃之

晉

周虓南安城人少有節操寧康初任梓潼太守爲苻堅所獲欲以爲尚書郎不受屢詆堅欲謀襲之堅引問狀虓曰昔豫讓爲智伯臣猶漆身吞炭不忘忠節况虓世荷晉恩豈敢忘耶堅乃從於太原病卒後子興迎致其喪冠軍將軍謝元臨哭之爲請贈龍驤將軍益州刺史賻錢二十萬布百疋以贍賜其家

北魏

元丕魏高祖時遷太尉錄尚書事時淮南王他淮陽王尉元河東王苟頽並以舊老見禮每有大事引入禁中乘步挽杖於朝進退相隨丕他元三人皆容貌壯偉腰帶十圍大耳秀目鬚鬢斑白百僚觀瞻莫不祇聳唯苟頽小爲短劣姿望亦不逮之丕復遷太傅以老居并州會穆泰等不樂

南遷丕心頗然之詔丕應連坐免爲太原百姓其後妻二子聽隨時丕年垂八十猶自平城力載隨駕至洛陽高祖每遣左右慰勉之乃還晉陽高祖崩丕自并州來赴敕留洛陽尋詔以丕爲三老薨年八十二

辛紹先隴西狄道人父淵以義烈見稱西土世祖平涼州紹先內徙家於晉陽明敏有識量與廣平游明根范陽盧度世同郡李承等甚相友善先是蓼泉之戰淵以所乘馬援李歆而身死於難紹先三年口不甘味頭不櫛沐髮遂落盡至是常著垂裙皂帽起家中書博士轉神部令下邳太守加寧朔將軍太和十三年卒贈并州刺史晉陽公謚惠孫僧化東莞人識星分案天占以言災異時有所中爲通直散騎常侍普泰中爾朱世隆惡其多言遂繫於廷尉免官

永熙中出帝召僧化與中散大夫孫安都共撰兵法未就而帝入關遂罷元象中卒於晉陽

盧景裕字仲儒范陽涿人少聰敏專經爲學河間邢摩納與景裕從兄仲禮據鄉應西魏齊獻武王驛馬徵景裕繫晉陽獄後舍之使教諸子在館十日一歸家隨以鼎食興和中補齊王開府屬卒於晉陽齊獻武王悼惜之景裕注易行於世

李鉉字寶鼎渤海南皮人九歲入學書急就篇月餘便通以鄉里無可師遂與州里楊元懿河間宗惠振等結侶詣大儒徐遵明受業居徐門下五年常稱高弟二十三撰定孝經論語毛詩三禮義疏及三傳異同周易義例合三十餘卷用心精苦曾三冬不畜枕每至睡時假寐而已教授生

徒多至數百後以鄉里寡文籍來遊京師讀所未見書州
舉秀才武定中李同軌卒高祖令世子在京妙簡碩學以
教諸子世子以鉉應旨徵詣晉陽時中山石曜北平陽絢
北海王晞清河崔瞻廣平宋欽道及工書人韓毅同在東
館師友諸王鉉於講授之暇覽說文倉雅刪正六藝經注
中謬字名曰字辨顯祖受禪從駕還都爲國子博士詔以
經授濟南甚見優禮卒還葬故郡太子致祭奠之禮并使
王人將送儒者榮之

崔子約清河人休子悽弟性孝長八尺餘姿神雋異潛觀梁
使劉孝儀賓從見者駭目武定中與兄子瞻俱詣晉陽寄
居佛寺子瞻長子約二歲每憑几相對儀望俱華諸沙門
竊窺之以爲二天人也後爲考功郎卒

北齊

刁柔字子溫渤海人父整魏車騎將軍柔少好學綜習經史尤留心禮儀性強記至於氏族內外多所諳悉元象中隨例到晉陽高祖以爲永安公府長流參軍又令教授諸子天保時除中書舍人同修魏史卒

楊愔字遵彥宏農華陰人父津魏司空愔幼未嘗戲弄庭前有柰樹實落地羣兒咸爭之愔頽然獨坐其季父曄適入學館見之大相嗟異於宅內茂竹林邊別葺一室令獨處其中常以銅盤具盛饌以飯之因督勵諸子曰汝輩但如遵彥謹慎自得竹林別室銅盤重肉之食正光中隨父之并州性旣恬默又好山水遂入晉陽西懸甕山讀書永安中津爲并州刺史北道大行臺愔隨之任出帝初還華陰

營葬訖齊高祖尋徵赴晉陽愔從兄幼卿以直言見誅取
急就雁門溫湯療疾郭秀素害其能因致書恐之曰高王
欲送卿於帝所仍勸其逃亡愔遂棄衣冠於水濱若自沉
者變易名姓自稱劉士安入嵩山與沙門曇謨徵等屏居
削迹又潛之光州因東入田橫島以講誦爲業海隅之士
謂之劉先生太守王元景陰佑之神武知愔存遣愔從兄
寶猗齎書慰喻仍遣光州刺史奚思業令搜訪以禮發遣
神武見之悅除太原公開府司馬轉長史天保中遷尚書
右僕射尚太原長公主九年徙尚書令乾明元年二月以
忠衛濟南爲常山長廣二王所殺愔著詩賦表奏書論甚
多沒後散失門人鳩集所得者萬餘言

李德林字公輔博陵安平人該博典墳善屬文詞覈理暢齊

天保中舉秀才擢甲科皇建初詔搜揚人物追赴晉陽撰
思春賦一篇代稱典麗仕至柱國郡公終懷州刺史卒謚
文

盧公順范陽涿人胡后舅正山子早以文學見知武平中符
璽郎待詔文林館與博陵崔君洽隴西李師上同志友善
從駕晉陽寓居僧寺朝士謂康寺三少爲物論推許

隋

張虔威字元敬清河東武城人開皇初晉王廣出鎮并州盛
選僚佐以爲刑獄叅軍累遷爲屬與河內張衡甚見禮重
晉郎稱爲二張大業中累加開府歷江都贊治卒

崔曠字祖濟博陵安平人性至孝博學善屬文開皇中射策
高第累授晉王記室叅軍起居舍人大業四年從駕幸汾

陽宮登太行山詔問曠曰何處有羊腸坂對曰臣按漢書地理志上黨壺關縣有羊腸坂上曰不是又答曰臣按皇甫士安撰地書云太原北九十里有羊腸坂上曰是也因謂牛宏曰崔祖濬可謂問一知二終鷹揚長史

徐文遠洛州偃師人方正純厚有儒者風開皇中官太學博士詔往并州爲漢王諒講孝經禮記坐除名大業初復爲博士公卿竇威等多從授學後爲唐博士封東莞縣男裴仁基河東人開皇中以拜儀同領漢王諒府親信諒將反仁基苦諫諒怒囚之諒敗累授光祿大夫後以謀劫王世充復立越王侗遇害

唐

張平高綏州膚施人隋末爲鷹揚府校尉戍太原爲高祖所

識因叅謀議爲軍頭封蕭國公

夏侯端壽春人與高祖善大業中高祖帥師於河東討捕請
端爲副遂以御史監軍及義師起端在河東爲吏所捕送
長安高祖入關授秘書監加大將軍持節招慰河南節尤
著終梓州刺史

李思行趙州人嘗避讐太原高祖令赴長安還具論機變深
稱旨授左三統軍從破宋老生封樂安郡公卒謚襄

李高遷岐州岐山人隋末客遊太原高祖常引之左右擒高
君雅王威有力焉從平霍邑力戰功最

張後允蘇州崑山人父中有儒學隋漢王諒出牧并州引爲
博士後允從父在并州以學行見稱時高祖鎮太原引居
賓館太宗就授春秋左氏傳義師之舉後允首贊之貞觀

中歷授國子祭酒散騎常侍卒贈禮部尚書

段志元齊州臨濟人父偃隋末爲太原司法書佐志元從父客太原以剽果諸少年畏之甚爲太宗所識義兵起募得千餘人授都督府軍頭從平霍邑絳郡皆爲先鋒突擊桑顯和躡獲突厥通于稠桑封褒國公卒贈揚州都督謚曰忠壯

衛遯陽美人少習詩書學弓劍有武畧二十七遊并汾間遇高祖始建義旗遯以勇藝進備行列洎擒寶建德遯時挾鎗劍前突後翼太宗顧而奇之天下旣定錄其功拜將軍宿衛以母老且病乞歸侍詞旨哀激詔許之旣而以孝敬睦閨門以然信居鄉里及卒邑人懷其賢廟於荆溪之濱以平生弓甲懸東西廡下歲時祠祭頗福其土焉

李白字太白興聖帝九世孫隋末徙西域神龍初還客巴西
白十歲通詩書旣長隱岷山更客任城天寶初南入會稽
明皇召見懇求還山遂浮遊四方至并州嘗有憶舊遊寄
譙郡元參軍詩又有太原早秋詩太白在太原夏秋易李
歲月滋深晉祠尤爲亟遊地初白遊并州見郭子儀奇之
子儀嘗犯法白爲救免永王璘難作子儀請解官以贖後
客當塗代宗以左拾遺召而已卒

顏泉明常山太守杲卿子天寶十四載杲卿擒賊將高邈何
千年遣泉明與前正定令賈深內邱丞張通幽手力翟萬
德函賊將蔣欽奏首械二賊送長安至太原節度王承業
留之自上表獻之以爲已功及杲卿遇害真卿爲蒲州刺
史令泉明於河北訪求血屬購還姑女暨父將吏袁履謙

已下妻子奴隸等三百餘人悉以歸蒲州贍養久之隨其所詣而資送之又求得父屍與履謙屍護還長安世服其志行仁義

馬炫汝州郟人燧兄至德中李光弼鎮太原署掌書記常參軍謀光弼器焉歷連潤二州刺史以兵部尚書致仕卒

崔從字子乂清河武城人國子司業融曾孫少孤貧與兄能偕隱太原山中力學會歲饑拾橡實以飯講誦不輟怡然終日不出山巖如是者十年貞元初登進士立朝稜稜有風望四爲大鎮終檢校左僕射揚州大都督府長史贈司空謚貞能亦授嶺南節度使

賈直言大歷中代父飲酖以孝義著聞劉悟鎮澤潞奏置幕中悟纖微乖失直言盡理規箴潞軍圍監軍劉承偕直言

遽入責曰司空縱兵脅使者是欲效李司空耶他日復爲軍所指笑悟乃匿承偕於第以免穆宗徵爲諫議大夫悟拜章乞留復授檢校右庶子兼御史大夫依前充昭義軍行軍司馬劉從諫嘗見直言衣紫擁笏直言諫曰郎少年無襲山東態朝服可擅着耶悟卒大將劉武德等謀使鄰道表求襲位直言曰若從武德謀吾見劉氏爲元濟矣乃自攝留後使從諫居喪初從諫惟鄆兵二千同謀直言旣折之軍中遂安太和九年卒贈工部尚書

李師晦宗室子劉悟辟致幕府及從諫恣橫假事歸東都潞澤平擢伊闕令

歐陽詹字行周泉州晉江人貞元八年進士客太原旅懷呈薛十八侍御齊十二奉禮詩又陪太原鄭行軍中丞登汾

上閣詩見行周集

符璘字元亮令奇子降馬燧署爲軍副詔拜特進封義陽郡王旣聞父見害號絕泣血燧表其寃加檢校左散騎常侍賜晉陽第一區祁田五十頃燧討李懷光璘以五千兵先濟河與西師合從燧入朝爲輔國大將軍璘之降母匿里中獨免及田悅死詔迎至京賜宴別殿璘居環衛十三年卒贈越州都督

崔元翰齊國公日用從子第進士馬燧表爲太原掌書記召拜知制誥訓辭溫厚有典誥風年七十餘卒

高銖字重權渤海人第進士署太原張宏靖幕府遷監察御史擢給事中以直諫著歷禮部尚書卒

高銛字弱金銖弟第進士辟河東府叅謀歷禮部侍郎知貢